

REGULAMENTO ELECTORAL (ELECCIÓN 2022)



REGULAMENTO ELECTORAL PARA A ELECCIÓN A MEMBROS DA ASEMBLEA XERAL, PRESIDENTE E COMISIÓN DELEGADA DA FEDERACIÓN GALEGA DE XIMNASIA

Capítulo I. Disposicións xerais.

Artigo 1. Obxecto da normativa.

O presente regulamento electoral ten por obxecto regular o proceso de elección dos órganos de goberno: Asemblea Xeral, Presidente e Comisión Delegada, da Federación Galega de Ximnasia con representatividade durante o período 2022 a 2025.

Artigo 2. Celebración de eleccións.

A Federación Galega de Ximnasia procederá á elección da súa Asemblea Xeral, Presidente e Comisión Delegada no ano 2022. O calendario electoral será o indicado no anexo a convocatoria das eleccións. Os sobres e papeletas serán os establecidos no anexo deste regulamento.

Establécese como horario de apertura ao público, durante o proceso electoral, da sede federativa sita en Ourense, rúa Carlos Maside s/ o seguinte: Luns a Xoves de 09:00 a 14:00 e de 15:30 a 18:30 e Venres de 09:00 a 14:00.

Artigo 3. Do Regulamento electoral.

Este regulamento electoral é o conxunto de normas que regula a celebración do proceso electoral da Federación Galega de Ximnasia

A Secretaría Xeral para o Deporte resolverá, no prazo máximo de un mes, desde a entrada do regulamento no seu rexistro, sobre a súa aprobación ou a súa devolución para emendas.

Neste último suposto, indicaranse estas e concederanse dez días hábiles para proceder á dita emenda. Transcorrido un mes sen que a Se-

cretaría Xeral para o Deporte dite ningunha resolución se entenderá aprobado o regulamento.

No caso de ser necesaria a subsanación de emendas, indicaranse as mesmas e se concederán dez días hábiles para proceder a dita corrección.

Unha vez feitas estas modificacións, o novo regulamento presentárase á Secretaría Xeral para o deporte para a súa ratificación definitiva.

Unha vez aprobado o regulamento pola Secretaría Xeral para o Deporte, esgotarase a vía administrativa e unicamente poderá ser obxecto de recurso contencioso administrativo.

O regulamento electoral aprobado estará publicado no taboleiro de anuncios e na páxina web da Federación Galega de Ximnasia (www.ximnasia.com) no apartado "eleccións" durante todo o proceso electoral. .

Capítulo II. Órganos electorais.

Artigo 4. Comisión xestora. Composición duración e funcións

1. Unha vez convocadas as eleccións, a xunta directiva da federación entenderase disolta, asumindo as súas funcións unha comisión xestora.

2. A composición da comisión xestora da Federación Galega de Ximnasia, que estará formada por 8 membros máis unha presidencia, será a seguinte:

a) Catro membros elixidos pola comisión delegada, debendo ter representación os estamentos de: entidades deportivas, deportistas, xuíces/árbitros e adestradores/adestradoras. Esta regra de representatividade deberá observarse tanto na designación de persoas titulares coma de suplentes.

b) Catro membros designados pola xunta directiva antes da súa disolución ou, no seu caso, pola persoa titular da presidencia da federación, entre os que se deberán incluír as persoas que exercerán as funcións de secretaria e tesourería da federación.

c) A presidencia da comisión xestora corresponderá a quen presida a Federación Galega de Ximnasia ou, cando cese en dita condición cando finalice o seu mandato, cando renuncie ao posto, cando prospere unha moción de censura ou cando presente a candidatura, quen sexa elixida para tal función por e entre as que integren a comisión xestora.

3. As persoas que presenten a súa candidatura para formar parte dos órganos de goberno e representación da Federación non poderán ser membros da comisión xestora, debendo cesar en dita condición ao presentar a candidatura en cuestión.

4. A comisión xestora entenderase extinguida unha vez tomen posesión todos os membros dos órganos de goberno da Federación Galega de Ximnasia.

5. A comisión xestora será o órgano encargado de administrar e xestionar a Federación durante o proceso electoral, non poderán realizar actos que directa ou indirectamente, mediata ou inmediatamente, induzan ou condicionen o sentido do voto dos electores, e deberán observar os principios de obxectividade, transparencia do proceso electoral e igualdade entre os actores electorais. Estas accións serán aplicables á actividade desenvolvida polo persoal da federación e polos restantes órganos federativos durante o proceso electoral.

6. Se por circunstancias ou incidencias xurdidas durante o proceso electoral a finalización do mesmo se demorase en exceso, dificultando, comprometendo ou poñendo en risco o desenvolvemento ordinario da actividade deportiva da Federación, a comisión xestora, coa supervisión e autorización da Secretaría Xeral para o Deporte, poderá adoptar as medidas imprescindibles para evitar dita situación.

Artigo 5. Da xunta electoral. Composición e duración Funcións.

1. Constituirase unha única xunta electoral que será o órgano encargado e de control das eleccións. Deberá resolver en primeira instancia as reclamacións que se presenten contra toda decisión adoptada no proceso electoral, agás a convocatoria das eleccións e a adopción do acordo polo que se aproba o regulamento electoral que unicamente poderá ser obxecto de recurso directamente ante o Comité Galego de Xustiza Deportiva.

2. A xunta electoral estará integrada por tres membros titulares e tres suplentes, que serán elixidos e designados pola asemblea xeral na mesma sesión na que se aproba o regulamento electoral, entre as persoas que presenten a súa candidatura a membros da xunta electoral. As candidaturas deberanse presentar na mesma asemblea na que se celebre a súa elección, podendo estar os candidatos presentes na mesma. De non existir candidatos, serán designados pola comisión delegada no prazo de tres días hábiles dende a celebración de dita asemblea.

As súas reunións celebraranse na sede federativa, e/ou a través de por medios telemáticos, cantas veces sexa necesario e ás súas decisións serán publicadas no taboleiro de anuncios e na web da Federación na sección "eleccións". As persoas integrantes da xunta electoral poderán ser validamente convocadas para que a sesión se celebre en varios lugares simultaneamente sempre que os medios técnicos permitan o normal desenvolvemento da sesión e o respecto dos dereitos das persoas membros.

3. As persoas candidatas a membros da xunta deberán reunir os seguintes requisitos:

- a) Ser maior de 18 anos.
- b) Ter, cando menos, o título de bacharelato superior ou equivalente.
- c) Non formar parte dos órganos de goberno da federación, nin da comisión xestora nin ostentar postos directivos na federación.
- d) Non presentarse como candidato a membro da asemblea xeral. No suposto de presentarse como candidato a membro da Asemblea xeral ou á presidente da federación cesará no seu posto na xunta electoral e será substituído polo suplente.
- e) Non estar cumprindo sanción disciplinaria firme ou sanción administrativa firme en materia deportiva que comporte sanción de inhabilitación para ocupar cargos nunha organización deportiva.
- f) Aceptar expresamente o cargo de membro da xunta electoral.

4. Poderán ser candidatas a membros da xunta electoral as persoas que non teñan a condición de federada ou de membro da asemblea.

5. Os membros da xunta electoral elixirán entre eles ás persoas que desempeñen a presidencia e a secretaría da mesma. No seu defecto, ostentará a presidencia da xunta electoral o membro elixido de entre eles de maior idade e a secretaría o de menor idade.

6. A xunta electoral constituirase no prazo máximo de dous días desde a data da convocatoria do proceso electoral.

7. Ao día seguinte da constitución da xunta electoral, a persoa que ocupe a secretaría desta enviará á Secretaría Xeral para o Deporte a relación de persoas que constitúen a xunta electoral.

8. O mandato dos membros da xunta electoral será ata a convocatoria do seguinte proceso electoral, e as eventuais vacantes que se produzan serán cubertas polo mesmo procedemento e cunha duración polo tempo restante ata a convocatoria do seguinte proceso electoral.

9. Son funcións da xunta electoral:

a) Velar que se axuste a dereito o proceso electoral dos órganos de goberno e representación federativos.

b) Organizar os procesos das eleccións para a asemblea xeral e presidente da federación, segundo o disposto neste regulamento electoral.

c) Designar as mesas electorais de conformidade co previsto neste regulamento electoral.

d) Proclamar as candidaturas a membros da asemblea xeral e a presidencia que reúnan os requisitos esixidos.

e) Garantir a exposición de censos, candidaturas e outros documentos segundo se establece neste regulamento electoral.

f) Conocer e pronunciarse, en primeira instancia, sobre as reclamacións que se presenten en materia electoral. A xunta electoral esta obrigada a resolver expresamente e no prazo concedido ao efecto todas as reclamacións que se formulen.

g) Custodiar a documentación correspondente a todo o proceso electoral, excepto o que non lle corresponda do procedemento do voto

por correo, ata a súa finalización que será cando remate o prazo para a impugnación da toma de posesión da presidencia da federación.

h) En xeral, cantas facultades lle sexan atribuídas por este regulamento electoral.

i) As decisións da xunta electoral tomaranse por maioría de votos, non sendo admisible a abstención.

j) A asistencia á xunta electoral é obrigatoria salvo ausencia xustificada.



Capítulo III. Das persoas electoras e elixibles á Asemblea Xeral.

Artigo 6. Das persoas electoras e elixibles á Asemblea Xeral.

1. Poderán ser persoas electores e elixibles á asemblea xeral:

a) No caso dos estamentos constituídos por persoas físicas (deportistas, adestradores e árbitros/xuíces) as que reúnan os seguintes requisitos:

- Ser maior de idade na data da celebración das votacións.
- Ter licenza federativa en vigor na data da convocatoria das eleccións e nas dúas tempadas anteriores á da realización das eleccións.
- Ter participado nas dúas tempadas anteriores á de realización das eleccións nunha competición deportiva oficial celebrada en cada tempada. No caso de que, por causa de forza maior, non se tivesen realizado competicións deportivas oficiais no período indicado anteriormente, abondará con ter participado nunha competición deportiva oficial na tempada do último calendario oficial desenvolvido.

Este requisito non será exixido para o caso das persoas que teñan a condición de xuíces e árbitros.

- Nas modalidades ou especialidades deportivas en que a actividade deportiva non ten carácter competitivo, será suficiente con ser maior de idade na data de realización das votacións e ter licenza federativa en vigor pola Federación Galega de Ximnasia na data



de convocatoria das eleccións e dende xaneiro do ano anterior ao da realización das eleccións.

Ademais dos anteriores requisitos, comúns para ser elector e elixible, constitúe requisito específico de elixibilidade nestes estamentos que se trate de persoas que non estean inhabilitadas para ocupar cargos directivos ou de representación no ámbito deportivo por resolución firme na vía administrativa ditada polo órgano disciplinario competente, nin estar inhabilitadas para o desempeño de cargo público ou de representación por sentenza xudicial firme.

b) No estamento de entidades deportivas, as que reúnan os seguintes requisitos:

- Entidades deportivas que figuren inscritas, dende xaneiro dos dous anos anteriores ao ano da celebración das eleccións, na federación galega de Ximnasia e no Rexistro de Entidades Deportivas de Galicia.

- Que teñan participado, dende xaneiro dos dous anos anteriores ao ano de celebración das eleccións, como mínimo, nunha competición oficial en Galicia cada tempada. No caso de que, por causa de forza maior, non se tivesen realizado competicións deportivas oficiais no período indicado anteriormente, abondará con ter participado nunha competición deportiva oficial na tempada do último calendario oficial desenvolvido.

2. Para os efectos deste artigo entenderase como competición deportiva oficial de ámbito autonómico as cualificadas, organizadas e incluídas como tales no calendario oficial da Federación Galega de ximnasia ou pola Secretaría Xeral para o Deporte dentro do seu ámbito competencial. Tamén se considerarán as competicións estatais e internacionais oficiais da federación española ou internacional ás que a federación galega de Ximnasia está adscrita.

3. Os membros da federación que pertencen a dous ou máis especialidades, e cumprindo para cada unha delas os requisitos do presente artigo, deberán optar por unha delas mediante escrito dirixido á xunta electoral que deberá cursarse no período de reclamacións ao censo provisional. De non existir opción individual se incluírán no censo daquela especialidade

practicada con máis antigüidade; e de ser esta a mesma na que haxa menos electores. As persoas membros da federación que pertencen a dous ou máis estamentos no censo provisional, deberán optar por un deles, mediante escrito dirixido á xunta electoral que deberá cursarse no período de reclamacións ao censo provisional. O criterio para identificar os electores nun único estamento, no caso de non exercer a opción individual, serán, por esta orde, no censo de xuíces/árbitros, no de adestradores ou no de deportistas.

4. Poderán ter a condición de elixibles aquelas persoas físicas e xurídicas que atopándose sancionada por un procedemento disciplinario deportivo, a sanción non comporte a inhabilitación da condición de elixible.

5. A licenza federativa única é a expedida pola federación galega. No caso de electores/as que cumprindo os requisitos establecidos no presente artigo, dispoñan dunha licenza federativa única expedida por unha federación distinta da galega, deberán solicitar por escrito, dirixido á xunta electoral, a súa intención de participar no proceso electoral no prazo establecido neste regulamento referente o censo electoral inicial.

Artigo 7. Das persoas electoras e elixibles á presidencia da federación e á comisión delegada.

1. Poderán ser electores/as á presidencia da federación e á comisión delegada os membros da asemblea xeral elixidos en cada proceso electoral.

2. Poderán ser elixibles para a presidencia da federación as persoas que cumpran, na data de celebración da elección, os seguintes requisitos:

a) Ser maior de idade e presentar unha candidatura avalada, como mínimo, polo 10% dos membros da asemblea; non será necesario que a persoa que presente a candidatura teña a condición de asembleísta nin de afiliada á federación deportiva correspondente.

b) Non estar inhabilitada para ocupar cargos directivos ou de representación no ámbito deportivo por resolución firme na vía administrativa ditada polo órgano disciplinario competente, nin estar inhabilitadas para o desempeño de cargo público ou de representación por sentenza xudicial firme.

c) Non ter sido condenado por delitos contra á facenda pública estatal ou autonómica galega nin contra a Seguridade Social, o que accredi-

tará a persoa interesada mediante a presentación da correspondente declaración.

3. Poderán ser elixibles para a comisión delegada as persoas físicas (deportistas, adestradores e xuíces/árbitros) e xurídicas (entidades deportivas) que teñan a condición de membro da asemblea xeral na data da celebración da elección.



Capítulo IV. Dos censos electorais.

Artigo 8. Do Censo electoral.

Elaboraranse tres censos electorais:

- a) Censo inicial.
- b) Censo provisional.
- c) Censo definitivo.

O censo electoral, ordenado alfabeticamente, incluirá aos deportistas, técnicos/adestradores, xuíces/árbitros e entidades deportivas inscritas na federación e no rexistro de entidades deportivas de Galicia, en listas separadas por especialidades deportivas, polos distintos estamentos deportivos de cada federación e por circunscrición electoral que reúnan os requisitos para ser electores e elixibles, de acordo co establecido no artigo 6º do presente regulamento.

Incluiranse os seguintes datos: para os/as deportistas, adestradores e xuíces/árbitros:

Apelidos, nome, número de licenza federativa, número do DNI, de pasaporte ou, da tarxeta de residencia, club de pertenza, consideración de deportistas de alto nivel e enderezo a efectos de notificación. Por defecto, o enderezo reflectido para o estamento de deportistas e técnicos será o da entidade deportiva ao que pertenzan, e respecto do estamento de xuíces/árbitros, o que a estes efectos indiquen a federación. No período de reclamacións ao censo provisional poderase solicitar o cambio de domicilio.

Para as entidades deportivas:

Nome, denominación ou razón social, enderezo e número de inscrición no rexistro de entidades deportivas de Galicia, correo electrónico así como a identificación do representante legal que exercerá o dereito a voto. Neste censo figurará como representante a persoa que ostenta a presidencia de cada entidade deportiva, que deberá acreditarse mediante certificado expedido polo rexistro de entidades deportivas de Galicia. Unha vez publicado o censo inicial, as entidades deportivas poderán designar como representante, e aos únicos efectos de emitir o voto, a unha persoa distinta a que ocupa a presidencia desa entidade, sempre que sexa membro da xunta directiva. Neste caso, a persoa designada figurará no censo definitivo como representante, sendo a única lexitimada para exercer o voto en representación desa entidade

Os datos contidos no censo electoral gozarán da protección do previsto na Lei Orgánica 15/1999, do 13 de decembro, de Protección de Datos de Carácter Persoal. En todo caso o tratamento e publicación dos datos contidos no censo terá por única finalidade garantir o exercicio polos electores do seu dereito de sufraxio, estando prohibida a súa cesión ou utilización para unha finalidade distinta a aquela.

a) Do censo Inicial :

Elaborarase un censo electoral inicial por cada estamento: clubs, deportistas, técnicos e xuíces.

Será exposto publicamente no taboleiro de anuncios da Federación Galega de Ximnasia e na web na sección "eleccións", durante catorce días hábiles, para os efectos de que as posibles persoas electoras poidan presentar aclaracións, rectificacións ou reclamación dentro do mesmo prazo, mediante escrito remitido a xunta directiva, que valorará os escritos presentados e procederá, se é o caso, á emenda ou corrección do censo electoral inicial no prazo máximo de cinco días hábiles.

No citado prazo, as entidades poderán solicitar que figure como representante delas no censo e como votante na elección de membros da asemblea xeral, unha persoa distinta ao presidente sempre que sexa membro da xunta directiva da entidade, condición que deberá acreditar mediante certificado expedido polo rexistro de entidades deportivas de Galicia.

Rematado os prazos indicados no paragrafo anterior, remitirase o censo electoral inicial xunto coas aclaracións, rectificacións ou reclamacións á Secretaría Xeral para o Deporte, no prazo de dez días hábiles e en soporte informático apto para tratamento de textos e datos, e irá xunto cunha relación de competicións oficiais de acordo cos calendarios deportivos oficiais aprobados da tempada do ano en que se realizan as eleccións e as dos dous anos anteriores. No caso de que por causa de forza maior, non se tivesen realizado competicións deportivas oficiais nos períodos indicados anteriormente, remitirase a relación de competicións oficiais na tempada do último calendario oficial desenvolvido.

b) Do censo provisional :

A xunta directiva, a vista do certificado da Secretaría Xeral para o Deporte, dará de baixa no censo inicial ás entidades deportivas galegas non inscritas no Rexistro de entidades deportivas de Galicia , así como non terá en consideración as competicións non incluídas no calendario deportivo oficial, formulando o censo electoral provisional.

O censo electoral provisional publicárase simultaneamente coa convocatoria electoral e deberá ser remitido pola secretaria da federación á xunta electoral no prazo máximo de catro días naturais desde a convocatoria.

Será exposto publicamente no taboleiro de anuncios da federación así como na páxina web da federación na sección "eleccións" por un prazo de dez días, dentro do cal se poderán presentar as reclamacións que se consideren oportunas ante a xunta electoral.

Rematado o prazo de exposición pública, a xunta electoral resolverá as reclamacións expresamente no prazo de cinco días hábiles. Transcorrido ese prazo sen resolución expresa, entenderase rexeitada a reclamación formulada.

Contra a resolución das reclamacións ao censo electoral provisional poderá interpoñerse, nun prazo máximo de tres días hábiles a contar desde a recepción da notificación da resolución da reclamación ou transcorrido o prazo máximo para resolver, recurso ante o Comité Galego de Xustiza Deportiva, que deberá resolver nun prazo de cinco días hábiles.

c) Do censo definitivo:

Unha vez resoltos os recursos, no caso de terse presentado, ou de non existir estes, a Xunta electoral elevará, no prazo de dous días hábiles, o censo electoral provisional a definitivo, sen que caiba impugnación posterior.

O censo definitivo será exposto nos mesmos lugares e da mesma forma que os censos provisionais e será exposto ata o día da votación á asemblea xeral. Ao existir máis dunha mesa electoral, no censo definitivo figurará a mesa electoral onde cada elector pode exercer o seu dereito a voto.

Aprobado o censo electoral definitivo a xunta electoral deberá aprobar, no su caso, os cambios que se deban facer na distribución inicial do número de representantes asignado a cada circunscrición electoral por especialidade e por estamento, cando os ditos cambios veñan impostos polas variacións ou modificacións do censo electoral provisional. Contra esta resolución da xunta electoral poderá interpoñerse, no prazo de tres días hábiles recurso ante o Comité Galego de Xustiza Deportiva que deberá resolver no prazo de cinco días hábiles.

Capítulo V. Das mesas electorais.

Artigo 9. Mesas electorais.

Para a celebración das votacións constituiranse tres tipos de mesa electoral:

1) Mesa electoral para a votación a candidatos da asemblea xeral da federación galega.

Constituiranse mesas electorais en cada provincia, para as elección de entidades deportivas, técnicos, xuíces e deportistas do día fixado para as votacións en horario de 16:00 a 20:30 e en:

A Coruña: Pza. Agustín Díaz, 3 15008 A Coruña. Nesta mesa electoral exercerán o seu dereito a voto os electores da provincia de A Coruña.

Lugo: Avda. Infanta Elena Duquesa de Lugo, s/n (Casa del Deporte) 27003 Lugo. Nesta mesa electoral exercerán o seu dereito a voto os electores da provincia de Lugo

Ourense: Carlos Maside s/n 32002 Ourense. Nesta mesa electoral exercerán o seu dereito a voto os electores da provincia de Ourense.

Vigo (Pontevedra): Fotógrafo Luis Ksado, 17 (Casa do Deporte)
36209 Vigo. Nesta mesa electoral exercerán o seu dereito a voto os electores da provincia de Pontevedra.

1. A mesa electoral estará composta por tres membros titulares (unha presidencia, unha secretaría e unha vogal) e tres suplentes destas, elixidos por sorteo pola xunta electoral entre os integrantes do censo definitivo. Serán presidente e secretario os membros de maior e menor idade respectivamente. A asistencia á mesa electoral é obrigatoria salvo causa xustificada que deberá ser autorizada pola xunta electoral.
2. A designación dos membros titulares e suplentes da mesa electoral realizarase nos dous días seguintes ao da proclamación definitiva das candidaturas. O sorteo, que incluírá o sorteo da mesa electoral do voto por correo, realizarase pola xunta electoral que publicará na páxina web o día e hora no que se realizará. As persoas propostas deberán aceptar esta designación no prazo dos dous días seguintes, agás causa xustificada e documentada que lles impida a aceptación do cargo.
3. Non poderán formar parte da mesa electoral as persoas candidatas á elección de membros da asemblea xeral.
4. Unha vez constituídos os órganos reitores da federación entenderanse disoltas as mesas electorais.
5. Para a mesa electoral, os candidatos poden nomear interventores da súa candidatura a calquera persoa maior de idade que serán identificadas ante a xunta electoral cunha antelación non inferior a tres días do día de realización das respectivas votacións. A xunta electoral expedirá a correspondente acreditación.
6. Os interventores poderán participar nas deliberacións da mesa, con voz pero sen voto, así como solicitar á mesma certificacións e formular ante ela protestas, todo iso sen prexuízo da lexitimación que lles corresponde conforme ao artigo 10 deste regulamento.
7. Son competencias da mesa electoral:
 - a) Comprobar a identidade dos votantes.

b) Recoller a papeleta de voto e depositala na urna pechada e preparada aos efectos.

c) Proceder á conta de votos.

d) Levantar acta dos votos emitidos, resultados e calquera outra incidencia, así como das incidencias e reclamacións, se as houber, facendo constar o número de votos obtidos por cada candidato.

e) Remitir á xunta electoral e a Secretaría Xeral para o Deporte a acta que será subscrita por todos os membros da mesa electoral, así como polas persoas interventoras, se os houbera, e remitirase polo secretario, ao día seguinte das votacións á xunta electoral que deberá garantir a súa exposición pública mediante publicación no taboleiro de anuncios e na páxina web da federación, www.ximnasia.com, no apartado "eleccións".

f) Tamén será remitida pola secretaría e no citado prazo, unha copia da acta das votacións á Secretaría Xeral para o Deporte que se publicará na súa páxina web.

II) Mesa electoral de voto por correo.

A xunta electoral designará unha mesa electoral do voto por correo que adecuará o seu funcionamento e obrigas ao disposto no apartado I) deste artigo, coas seguintes peculiaridades:

a) A súa sede será a da Secretaría Xeral para o Deporte.

b) Se constituirá ás 16:00 horas do día seguinte hábil á data de celebración da votación presencial. A persoa que asuma as funcións de secretario da Xunta Electoral deberá achegar a esta mesa electoral o censo definitivo coa indicación das persoas que exercerán o voto presencialmente, coa finalidade de garantir que non se computen os votos por correo que poidesen emitir estas persoas.

c) Formará parte da mesa como un vogal máis da mesma unha persoa que ostente a condición de empregada pública designado pola persoa responsable da Secretaría Xeral para o Deporte. Nos supostos de empates o voto do presidente será dirimente.

III) Mesa electoral para a votación á presidencia e comisión delegada da federación

a) A mesa electoral para a votación á presidencia e á comisión delegada da federación constituirase o día da votación no local ubicado en Rúa Carlos Maside s/n 32002, Ourense; e adecuará o seu funcionamento e obrigas ao disposto no apartado I) deste artigo.

b) A mesa electoral estará composta por tres membros: un/unha presidente/a, un/unha secretario/a e un/unha vogal, elixidos por sorteo entre os membros da asemblea xeral. O sorteo será realizado pola xunta electoral da federación.

c) Ostentarán a presidencia e a secretaria os membros de maior e menor idade desta mesa electoral, respectivamente. Así mesmo, e ata que conclúa a elección da presidencia da federación, exercerán as funcións da presidencia e secretaria da asemblea xeral da federación.

d) Non poderán formar parte da mesa electoral as persoas candidatas á presidencia da federación, nin as candidatas á Comisión Delegada. A aceptación da condición de membro da mesa electoral implica a renuncia a presentar candidatura á presidencia da federación galega de Ximnasia

e) Primeiro elixirase o/a presidente/a da federación e a continuación procederase á elección dos membros que correspondan da comisión delegada da federación, entre os/as candidatos/as de cada estamento polos membros asembleístas de cada un deles .

f) Unha vez constituídos todos os órganos reitores da federación entenderanse disoltas as mesas electorais.

Artigo 10. Das persoas interventoras.

1. Por cada mesa electoral, as persoas candidatas poden nomear interventores/as da súa candidatura a calquera persoa maior de idade que serán identificadas ante a xunta electoral cunha antelación non inferior a tres días do día de realización das respectivas votacións.

Correspóndelle á xunta electoral expedir a correspondente acreditación como interventor/a.

2. Os/as interventores/as poderán participar nas deliberacións da mesa, con voz pero sen voto, así como solicitarlle certificacións e formularlle protestas, todo iso sen prexuízo da lexitimación que lles corresponde para presentar recursos ante a xunta electoral e Comité Galego de Xustiza Deportiva.

3. A Secretaria Xeral para o Deporte poderá designar, entre o seu persoal, a observadores nas mesas electorais coa función de comprobar o desenvolvemento das votacións, debendo emitir un informe do observado na xornada de votación.



Capítulo VI. Do proceso electoral.

Artigo 11. Convocatoria.

1. A convocatoria das eleccións será feita polo presidente da Federación Galega de Ximnasia, conforme a este regulamento electoral aprobado pola Secretaría Xeral para o Deporte.

2. Simultaneamente á convocatoria de eleccións, a xunta directiva disolverase, constituíndose unha comisión xestora que non poderá realizar mais que actos de mera administración e trámite.

3. A convocatoria de eleccións comunicarase a Secretaria Xeral para o Deporte e publicarase no taboleiro de anuncios da sede da federación, así como na páxina web (www.ximnasia.com) na sección "eleccións" (<https://www.ximnasia.com/elecciones.htm>) . O acceso á referida sección non precisará de solicitude, pero será necesaria a identificación previa para acceder ao censo provisional e definitivo, acceso que restrinxirase ás persoas físicas e xurídicas integrantes da federación dende o ano 2018 ata o 2022 así coma os candidatos a membros da asemblea xeral, á Secretaria Xeral para o Deporte e ao Comité Galego de Xustiza Deportiva

. A notificación da convocatoria de eleccións conterá cantos datos se precisen para o correcto desenvolvemento do proceso electoral, e sinaladamente:



a) O calendario electoral, aprobado e selado por a Secretaría Xeral para o Deporte, con indicación do lugar, data e hora de celebración dos actos propios do proceso electoral.

b) O censo electoral provisional.

c) A distribución do número de persoas membros da asemblea xeral por especialidades, estamentos e circunscricións electorais que deberá reflectir a distribución inicial establecida no regulamento electoral do número de representantes asignado a cada circunscrición por especialidade e por estamento.

d) A data e lugar de realización e o horario das votacións

e) Os modelos oficiais de sobres e papeletas.

f) O regulamento electoral.

g) O procedemento e os prazos para o exercicio do voto por correo.

h) A forma de remisión da documentación á xunta electoral e á Secretaría Xeral para o Deporte.

i) A composición nominal e sede da xunta electoral da Federación e os prazos para a súa recusación, así como o enderezo postal e electrónico da xunta electoral. Este último deberá ser independente de calquera outro correo electrónico da Federación.

4. A convocatoria deberá ser obxecto da máxima publicidade e difusión posibles, utilizando todos os medios electrónicos e informáticos dos que dispón a federación, a lo menos no taboleiro de anuncios e na páxina web da Federación Galega de Ximnasia (www.ximnasia.com)

Esta publicación será avalada, mediante certificación da Secretaría Xeral da Federación Galega de Ximnasia e será exposta xunto coa documentación anterior.

5. O acto da convocatoria poderá ser recorrido ante o Comité Galego de Xustiza Deportiva nun prazo de tres días hábiles desde a data da súa completa publicación, de acordo coa certificación anterior.

Artigo 12. Calendario electoral.

1. O calendario electoral para a elección dos membros dos órganos reitores da federación respectará os prazos, obrigas e prohibicións estable-

cidos no decreto regulador dos procesos electorais das federacións deportivas.

2. O calendario electoral se publicará como anexo a convocatoria do proceso electoral.

3. Os prazos deste calendario para a presentación de escritos, reclamacións e recursos, cando estean sinalados por días, entenderase días hábiles e expirarán ás 14:00 horas do derradeiro día de prazo, salvo disposición en contrario. Se o día final do prazo coincide con día inhábil de carácter autonómico ou estatal, ou cun día no que non estean abertas as dependencias da federación en aplicación do convenio colectivo dos traballadores de entidade, entenderase que remata o día hábil inmediato seguinte.

Artigo 13. Circunscricións electorais.

A circunscrición electoral para elixir:

- a) As persoas representantes das entidades deportivas na asemblea xeral será provincial.
- b) As persoas membros do estamento de deportistas será autonómica.
- c) A técnicos, xuíces e árbitros e, se é o caso, outros colectivos interesados será a autonómica.

Artigo 14. Da campaña electoral.

1. Entendese por campaña electoral o conxunto de actividades lícitas levadas a cabo polas persoas candidatas encamiñadas á captación de sufraxios.

2. A campaña electoral iniciarase ás 00:00 horas do día posterior á proclamación definitiva de candidaturas e rematará ás 00:00 horas do día inmediatamente anterior á data fixada para a votación; desde este momento non se poderá realizar propaganda algunha en favor de ningunha candidatura.

Artigo 15. Papeletas e sobres.

1. As papeletas dos/das candidatos/as e os sobres de votación serán facilitados, en número suficiente, pola xunta electoral da federación á mesa electoral correspondente.

2. As papeletas confeccionaranse en cores diferentes para cada estamento que vaia obter representación na asemblea xeral.




Capítulo VII. Do sistema de elección a membros da asemblea xeral.

Artigo 16. Das listas abertas.

O sistema de votación para participar no proceso electoral a membros da asemblea xeral responderá ao sistema de listas abertas.

Artigo 17. Sistema de votación a membros da asemblea xeral.

1. A votación a membros da asemblea realizarase en urnas separadas por estamentos e especialidade. A votación desenvolverase sen interrupcións durante o horario de 16:00 a 20:30 horas. Soamente por causa de forza maior poderán non iniciarse ou interromperse as votacións. En caso de suspensión da votación non se terán en conta os votos emitidos nin se procederá ao seu escrutinio. Neste caso, a xunta electoral fixará unha data para a nova votación.
2. O dereito de votar será acreditado pola inscrición no censo electoral definitivo. Para a súa identificación, o elector deberá presentar documento acreditativo da súa personalidade (DNI, pasaporte, tarxeta de residencia ou permiso de conducir con fotografía do titular). No caso das persoas xurídicas a representación corresponde exclusivamente á persoa que figura no censo electoral definitivo.
3. As persoas electoras poderán marcar na súa papeleta ata unha persoa candidata máis das que lles corresponde elixir ao estamento e/ou circunscrición electoral a que pertence.
4. Unha vez realizado o escrutinio do voto por correo, este remitirase á xunta electoral que proclamará provisionalmente as persoas que formarán parte da asemblea xeral.



5. Contra o acordo de proclamación provisional efectuado pola xunta electoral, poderá presentarse recurso ante o Comité Galego de Xustiza Deportiva no prazo de tres días hábiles que deberá resolver nun prazo de tres días hábiles.
6. Finalizado o prazo para a interposición dos recursos ou, se é o caso, resoltos estes recursos administrativos, a proclamación de candidatos electos elevarase a definitiva.
7. Se un membro electo da Asemblea perdera a condición pola que foi elixido, causará baixa automaticamente naquela, procedéndose á súa substitución da seguinte forma:
 - As vacantes que se produzan na asemblea xeral antes das seguintes eleccións xerais a ela serán cubertas, dentro de cada estamento e de maneira sucesiva, polos candidatos que no proceso electoral obtivesen maior número de votos despois dos que resultaron electos e, a falta destes, mediante a realización de eleccións parciais sempre que, neste último caso, as vacantes superen o 20% dos membros da asemblea.
 - Os elixidos para ocuparen as vacantes a que se refire o apartado anterior exercerán o seu mandato polo tempo que falte para a celebración das seguintes eleccións xerais.

Artigo 18. Composición da Asemblea xeral.

1. O número de membros da asemblea xeral é de 57 coa seguinte distribución por estamento, especialidade e circunscrición:
 - a. Estamento de Entidades Deportivas: 35 (61,4 %)
 - i. 14 asembleístas Pontevedra; dos cales 1 de trampolín, 1 de Acrobática e 12 de Rítmica
 - ii. 10 asembleístas A Coruña; dos cales 9 de Rítmica e 1 de Artística
 - iii. 5 asembleístas Ourense; 4 de Rítmica, 1 trampolín/Acrobática

iv. 6 assembleístas Lugo; todos de Rítmica

b. Estamento de Deportistas: 11 (19,29 %)

i. Dos cales 8 corresponden á especialidade de Rítmica, 1 á especialidade de Trampolín (DGAN), 1 á especialidade de Acrobática e 1 Ximnasia Artística

c. Estamento de Adestradores: 6 (o 10,5%)

i. Dos cales 3 corresponden á especialidade de Rítmica, 1 á de Artística, 1 á especialidade de Acrobática e 1 Ximnasia Trampolín

d. Estamento de Xuíces: 5 (o 8,77 %)

i. Dos cales 2 corresponden á especialidade de Rítmica e 1 á de Artística, 1 a Trampolín e 1 a Acrobática.

Unha vez aprobado o censo definitivo de cada un dos estamentos e especialidades tendo en conta o número de membros do estamento das entidades deportivas, a xunta Electoral fixará o número concreto de membros de cada estamento e especialidade.

Os seus membros serán elixidos mediante sufraxio libre, igual, directo e secreto por e entre os compoñentes de cada estamento de conformidade co número e porcentaxes de representación que se establecen no presente regulamento.

2. Na asemblea xeral estarán representados todos os estamentos e especialidades recoñecidos nos estatutos e integrados na federación: as entidades deportivas, os deportistas, os adestradores e os árbitros/xuíces.

3. A representación das entidades deportivas corresponde á presidencia ou á persoa que conforme os estatutos de cada entidade lle corresponda. Esta representación acreditarase fidedignamente mediante certificación do rexistro de entidades deportivas de Galicia na que figure expresamente as persoas que teñan a condición de representantes legais da entidade.

4. Non cabe representación das persoas físicas.

5. Ningún membro da asemblea poderá desempeñar unha dobre representación nesta.

6. A persoa titular da presidencia da federación será membro nato da asemblea xeral.

7. O presidente da federación desempeñará a presidencia da asemblea xeral.

8. A Federación axustarase, no posible, nas súas actuacións ás recomendacións feitas pola Lei 7/2004, do 16 de xullo, galega para a igualdade de mulleres e homes.

Artigo 19. Proporcionalidade na composición da Asemblea xeral.

1. A porcentaxe de cada estamento será nas seguintes proporcións:

a) Representantes de entidades deportivas: entre o 40% e o 70%

b) Representantes de deportistas: entre o 20 % e o 40%. Unha porcentaxe do 10% deles deberá ser elixido por e entre quen ostente a consideración de deportista de alto nivel na data de aprobación do censo provisional. Os e as deportistas de alto nivel que non desexen ser adscritos a este cupo deberán comunicalo expresamente á Xunta Electoral, e de non facelo serán encadrados no cupo reservado a deportistas de alto nivel. Cando o número ou a porcentaxe de deportistas de alto nivel nunha Federación non permita cubrir as vacantes correspondentes a dito colectivo, estas serán cubertas polas restantes persoas membros do estamento de deportistas.

c) Representantes de adestradores e adestradoras: entre o 5% e o 20%.

d) Representantes de xuíces/árbitros: entre o 5% e o 20%.

2. Unha vez aprobado o censo electoral definitivo de cada un dos estamentos e especialidades, e tendo en conta o número de membros do estamento de entidades deportivas, a xunta electoral no prazo máximo de dous días hábiles fixará o número concreto de membros de cada estamento e especialidade, segundo as porcentaxes e criterios establecidos neste regulamento electoral. Esta decisión da xunta electoral non é impugnabile e deberá ser notificada, no prazo de dous días hábiles, á Secre-

taria Xeral para o Deporte para a súa autorización ou modificación. A resolución da Secretaria Xeral para o Deporte porá fin á vía administrativa e contra ela poderase interpoñer recurso contencioso administrativo.

3. A representación do estamento de entidades deportivas na asemblea xeral da Federación Galega de Ximnasia ao ser o censo definitivo de entidades deportivas inferior a 100, estarán representados no estamento de clubs un mínimo do 50 % deles. En calquera caso todas as entidades deportivas deberán necesariamente cumprir os requisitos que para eles se establece neste regulamento.

4. Cando o número de candidatos de calquera estamento e, no seu caso, especialidade coincida ou sexa inferior ao número de membros que hai que elixir non será necesaria a celebración de eleccións polo que a ese estamento se refire, dando continuidade ao procedemento electoral.

Non obstante, no caso de que nalgún estamento da asemblea houbera máis dun 20% de vacantes, durante o período electoral dos catro anos, o presidente procederá, no prazo máximo de 3 meses, á convocatoria parcial de eleccións para cubrir as vacantes, sen que esta nova convocatoria parcial afecte aos xa elixidos.

Artigo 20. Das persoas candidatas a membros electos da asemblea xeral.

1. Poderá ser persoa candidata a membro da asemblea xeral toda persoa física ou xurídica incluída no censo definitivo que o solicite personalmente, por correo certificado ou por calquera outro medio que acredite fidedignamente en dereito a devandita solicitude, ante a xunta electoral. Para a solicitude establececese un prazo de cinco días hábiles contados desde a publicación do censo definitivo.

2. Unha vez rematado o prazo anterior, a xunta electoral no prazo de dous días hábiles proclamará a lista provisional de candidatos facéndoa pública no taboleiro de anuncios e na páxina web da Federación Galega de Ximnasia, na sección "eleccións".

3. Poderán formularse reclamacións contra a lista provisional de persoas candidatas, no prazo de tres días hábiles, ante a xunta electoral, que disporá de idéntico prazo para resolver.

4. Contra a resolución da xunta electoral poderá interpoñerse, no prazo de tres días hábiles, recurso ante o Comité Galego de Xustiza Deportiva, que deberá resolver no prazo de sete días hábiles.

5. Unha vez resoltos os posibles recursos si as houbera, nun prazo de dous días hábiles, procederase á proclamación definitiva de candidatos.

Artigo 21. Das candidaturas á presidencia da federación galega.

1. Poderá presentar candidatura á presidencia da federación galega de Ximnasia aquelas persoas que reúnan os requisitos establecidos no artigo 7.

2. O prazo para presentar as candidaturas será de cinco días hábiles, contados desde a proclamación definitiva de candidatos electos da asemblea xeral. A presentación de candidaturas farase na sede oficial da federación, mediante escrito dirixido á xunta electoral.

3. As persoas candidatas á presidencia deberán presentar as súas candidaturas e deberán ir avaladas polo 10% dos membros da asemblea xeral. Un membro poderá avalar cantos candidatos considere oportunos.

4. A xunta electoral procederá a comprobar a validez dos avais presentados por cada persoa candidata e, a continuación proclamará as candidaturas que cumpran os requisitos para ser elixible.

5. Unha vez presentadas as candidaturas, a xunta electoral proclamará a lista provisional de persoas candidatas e fará pública no taboleiro de anuncios da federación e na páxina web na sección "eleccións".

6. Poderán formularse reclamacións contra a lista provisional de candidatas no prazo de tres días, ante a xunta electoral, que disporá de idéntico prazo para resolver.

7. Contra a resolución da xunta electoral poderá interporse, no prazo de tres días hábiles, recurso ante o Comité Galego de Xustiza Deportiva, que resolverá no prazo de sete días hábiles.

8. A proclamación definitiva de persoas candidatas á presidencia efectuarase no prazo de dous días hábiles desde a resolución do recurso anterior.

9. A persoa que resulte elixida como presidente non poderá desempeñar ningunha outra actividade directiva ou de representación dentro da propia estrutura federativa e non se poderá simultanear a presidencia dunha entidade deportiva coa presidencia da federación deportiva na que se integre a dita entidade deportiva.

10. Se algún membro da comisión xestora presenta a súa candidatura á presidencia, deberá cesar naquela.



Artigo 22. Proclamación dos membros da asemblea xeral.

1. Unha vez realizado o escrutinio do voto por correo, este remitirase á xunta electoral que proclamará provisionalmente as persoas que formarán parte da asemblea xeral. En caso de empate entre dous ou máis candidatos resolverase atendendo o criterio de antigüidade coma federado.

2. Contra o acordo de proclamación provisional efectuado pola xunta electoral, poderá presentarse recurso ante o Comité Galego de Xustiza Deportiva no prazo de tres días hábiles que deberá resolver nun prazo de sete días hábiles.

3. Finalizado o prazo para a interposición dos recursos ou, se é o caso, resoltos estes recursos administrativos, a proclamación de candidatos electos elevarase a definitiva.

4. As persoas candidatas que non resultaran electas conformarán unha listase ordenada de maior a menor número de votos por estamentos e cubrirán as vacantes que se produzan na asemblea xeral durante o mandato electoral.

5. No caso de renuncia ou vacante da metade mais un dos membros da asemblea xeral, constituirase unha comisión xestora conforme á composición establecida, que asumirá as funcións da asemblea xeral ata o remate do mandato electoral.

Capítulo VIII. Elección da presidencia e comisión delegada da federación.

Artigo 23. Constitución da asemblea xeral.

1. As persoas electas como membros da asemblea xeral tomarán posesión do seu cargo antes da sesión constitutiva que terá lugar en Rúa Carlos Maside s/n 32002 Ourense, no prazo máximo de cinco días hábiles desde a

súa proclamación definitiva. A toma de posesión formalizarase mediante a presentación dun escrito presentado pola persoa elixida aceptando o cargo e dirixido á xunta electoral, no prazo anteriormente fixado. Entre a data da proclamación definitiva de persoas membros da assemblea xeral e a data da sesión constitutiva da assemblea xeral para a elección da presidencia da federación deberá transcorrer, como mínimo, o prazo de dez días hábiles.

2. A sesión constitutiva da asemblea xeral será presidida pola mesa que se constituía conforme ao disposto no artigo 9.III desde regulamento.



Artigo 24. Elección da presidencia da federación.

1. No día e hora fixados na convocatoria polo presidente da xunta electoral, constituirase a asemblea xeral en primeira ou segunda convocatoria tendo como únicos puntos da orde do día a elección a presidente e a membros da comisión delegada.

2. O presidente da federación será elixido mediante sufraxio libre, directo, igual e secreto polos membros da asemblea xeral presentes no momento da elección.

3. O voto dos membros da asemblea xeral será único, non admitíndose o voto por correo nin a delegación de voto.

4. Comezada a sesión e constituída a mesa electoral, o presidente presentará os candidatos, iniciando, de seguido, o proceso de votación.

5. Os candidatos poderán expor os seus programas (se o estiman oportuno), procedéndose posteriormente á votación en urna para a elección do presidente, que será secreta.

6. No caso de que se presentase unha soa candidatura, non se efectuará votación.

7. Se non se presentase ningunha candidatura ou non fose válida ningunha das presentadas realizarase unha nova convocatoria da asemblea xeral nun prazo non inferior a sete días nin superior a catorce días hábiles. Se nesta segunda convocatoria non se presentase ningunha candidatura ou non fose válida ningunha das presentadas, a comisión xestora adminis-



trará a federación e convocará e realizará novas eleccións a presidente no prazo máximo de tres meses.

8. Unha vez presentadas a totalidade das candidaturas iniciárase o proceso de votación.

9. Na primeira votación son elixibles todas as persoas candidatas da listaxe definitiva. Aquelas que obteñan un mínimo do 10% dos votos dos membros presentes pasarán á seguinte votación. No suposto de que ningunha candidatura acade o 10% dos votos das persoas membros presentes, pasarán á seguinte votación aquelas dúas candidaturas que contén cun maior número de votos. No suposto en que soamente sexa unha candidatura a que obteña o 10% dos votos das persoas membros presente, pasará tamén á seguinte votación a seguinte ou seguintes candidaturas en caso de empates en número de votos. De acadarse por algunha candidatura a maioría absoluta dos votos, nesa primeira votación, será proclamado presidente ou presidenta da federación.

10. Na segunda votación soamente será elixido presidente ou presidenta da federación a candidatura que nesta fase obteña a maioría absoluta dos votos.

11. No caso de que na votación anterior ningunha candidatura obteña a maioría absoluta dos votos emitidos, procederáse a unha terceira nova votación entre as dúas candidaturas máis votadas na segunda votación, e resultará elixida a que obteña maioría de votos emitidos. Para o caso de empate, resolveráse a favor da candidatura que obtiver maior número de votos na segunda votación e, de persistir o empate, a candidatura que obtiver maior número de votos na primeira votación e, no caso de persistir o empate, a favor da persoa candidata de maior idade.

12. Unha vez rematada a elección, a secretaría da mesa redactará a acta correspondente, que se exporá ao día seguinte no taboleiro de anuncios da federación e na súa páxina web, xunto coa resolución da Xunta electoral da proclamación provisional da persoa elixida presidenta da Federación de Ximnasia. Contra a resolución da xunta electoral caberá interpor, no prazo de tres días hábiles, recurso ante o Comité Galego de Xustiza Deportiva.

13. Finalizado o prazo de reclamacións, recursos e da súa resolución, a xunta electoral procederá á proclamación definitiva do cargo de presidente ou presidenta da federación.

14. Ao día seguinte da proclamación definitiva do cargo de presidente ou presidenta da federación, procederase á toma de posesión no seu cargo, da cal levantará acta a secretaría da xunta electoral. Unha copia desta acta será remitida á Secretaría Xeral para o Deporte no prazo de dous días.

Artigo 25. Elección de membros da comisión delegada.

1. Os membros da comisión delegada elíxense por e entre os membros da asemblea xeral, mediante sufraxio libre, igual, directo e secreto, podendo substituírse anualmente, polo mesmo procedemento, as vacantes que se produzan. O voto por correo non poderá utilizarse en ningún caso para a elección dos membros da comisión delegada.

2. O número de membros da comisión delegada da Federación Galega de Ximnasia será de nove máis o presidente que pertence a mesma como membro nato da mesma. Deberá gardarse a seguinte proporción:

- Un terzo da comisión delegada debe ser designado polo titular da presidencia da Federación (tres membros).
- Un terzo debe corresponder ás entidades deportivas, elixíndose esta representación por e de entre os mesmos (tres membros).
- Un terzo corresponderá aos demais estamentos (tres membros), en proporción a súa respectiva representación na asemblea xeral.

3. Poderán ser candidatos a membro da comisión delegada os membros da asemblea xeral mediante escrito dirixido a xunta electoral, facendo constar a condición de membro da asemblea xeral e manifestando expresamente a vontade de se presentar como candidato a membro da comisión delegada, especificando o estamento polo que se presenta. O prazo será de tres días hábiles dende a proclamación definitiva dos membros que compoñen a asemblea. Se no prazo establecido para presentar candidaturas se presentase un número inferior aos postos a elixir, ditos candidatos enténdense automaticamente elixidos sen votación e poderán presentarse no acto da asemblea xeral para cubrir as vacantes outros candi-

datos que serán sometidos a votación entre os restantes membros da asemblea. No caso de empate procederase a unha segunda votación entre os candidatos empatados, e se persiste o empate resolverase por sorteo.

5. O seu mandato coincidirá co da asemblea xeral. Será presidida polo presidente da federación como membro nato desta. Actuará como secretario o da federación.

Capítulo IX. Da xornada electoral.

Artigo 26. Constitución da mesa electoral.

1. As persoas designadas como membros da mesa electoral para a votación a membros da asemblea xeral e os seus suplentes e da mesa electoral para a votación á presidencia de cada federación, reuniranse o día das votacións unha hora antes da apertura do colexio electoral e procederán á constitución de dita mesa.

2. Se a presidencia ou os vogais non acoden serán substituídos polos seus suplentes.

3. En ningún caso se poderá constituír a mesa electoral sen a presenza da persoa presidenta e persoa secretaria da mesa.

4. No caso de ausencia da persoa presidenta e persoa secretaria, os membros da mesa presentes e os suplentes que acudan redactarán e asinarán unha declaración dos feitos acontecidos, e asumirán a función de presidencia ou secretaria, completando a mesa, total ou parcialmente, no seu caso, coas persoas electoras que estean presentes no local.

5. Transcorrida media hora desde a constitución da mesa electoral, a secretaria redactará a acta de constitución, que será asinada pola presidencia e os vogais.

6. A mesa electoral deberá dispoñer para cada un dos seus membros dun censo electoral definitivo dos electores da mesa separado por estamentos e especialidades.

Artigo 27. Das votacións.

1. Constituída a mesa electoral e na hora prevista a presidencia da mesa electoral anunciará publicamente o inicio das votacións.
2. Unha vez iniciado o acto de votación non se poderá suspender, agás causa de forza maior e sempre baixo a responsabilidade da presidencia da mesa electoral. No caso de suspensión, levantarase a correspondente acta, que será remitida no prazo das vinte e catro horas seguintes á xunta electoral, a fin de que se sinala a data en que se repetirá o acto de votación.
3. O dereito a votar será acreditado no censo electoral pola inscrición da persoa electora no censo electoral
4. A secretaria da mesa electoral anotará as persoas que voten, con indicación do número co cal figure no censo, así como o seu DNI, pasaporte ou carné de conducir xunto coa representación con que exerce o seu dereito a voto, se se trata dunha persoa xurídica.
5. O voto será secreto a as persoas electoras depositarán o seu voto na urna correspondente mediante unha papeleta introducida nun sobre.
6. A presidencia da mesa electoral será encargada de velar para que a entrada ao local das votacións sexa libre, de manter a orde nel durante a votación e escrutinio e de asegurar a liberdade das persoas electoras no colexio electoral.
7. A presidencia da mesa electoral, logo de consulta co resta das compoñentes da mesa, poderá expulsar do colexio electoral a calquera persoa que interfira a boa marcha das votacións.
8. Rematado o período sinalado para a votación, o presidente da mesa electoral anunciará que vai rematar e preguntará se algún dos electores presentes non votou, admitíndose os votos que se dean a continuación e non se permitirá a ningún máis a entrada no local.
9. Acto seguido, votarán as persoas membros da mesa, sempre que teñan dereito, e declararase pechada a votación.
10. No caso de rematar o exercicio do voto da totalidade das persoas electoras que figuren no censo, a presidencia da mesa electoral dará por

finalizada a xornada electoral e poderá iniciar o proceso de escrutinio de votos.

Artigo 28. Escrutinio.



1. Declarada pechada a votación comezará inmediatamente o escrutinio, función que corresponde exclusivamente á mesa electoral.
2. A presidencia procederá ao escrutinio das papeletas en voz alta, unha a unha, exhibindo cada papeleta ás persoas presentes e anotándose o voto correspondente a cada persoa candidata.
3. Concluído o escrutinio, que non poderá ser interrompido, estenderase a oportuna acta asinada por todos os compoñentes da mesa electoral.
4. Son nulos os votos emitidos en papeleta ou sobre de modelos distintos dos facilitados pola xunta electoral; as papeletas que teñan riscadas; os votos en que por calquera razón, non se poida determinar inequivocamente a candidatura elixida: aqueles votos en que se marquen máis nomes dos establecidos no regulamento electoral para cada estamento ou inclúan o nome de persoas non candidatas. No caso de conter máis de unha papeleta coas mesmas candidaturas marcadas, computarase como un só voto válido, para este caso se as candidaturas marcadas son diferentes deberá computarse como voto nulo. As papeletas deberán conservarse para o caso de que se faga algunha reclamación sobre elas.
5. Consideraranse votos en branco aqueles sobres que non conteñan ningunha papeleta e aqueles sobres que conteñan papeletas que non presenten ningunha marca.
6. Feito o recuento de votos segundo as operacións anteriores, que exerza a presidencia preguntará se hai algunha protesta que facer contra o escrutinio. Se non se formulan, ou despois de resoltas pola maioría da mesa, a presidencia anunciará en voz alta o resultado, especificando o número de votantes, de votos válidos, nulos, votos en branco e de votos obtidos por cada candidatura.

7. Concluídas as operacións, os membros da mesa asinarán a acta da sesión, na que figuraran, obrigatoriamente, os seguintes datos:

- a) Número de persoas electoras inscritos no censo de voto presencial.
- b) Número de votos emitidos.
- c) Votos declarados nulos, en branco e válidos.
- d) Número de votos válidos obtidos por cada persoa candidata.
- e) Observacións presentadas ante a mesa electoral sobre a votación e o escrutinio polas persoas candidatas ou interventoras.
- f) Resolucións motivadas da mesa electoral sobre as observacións presentadas e votos particulares.

8. As actas correspondentes aos resultados das votacións e o censo electoral no que conste os electores que exerceron o seu dereito a voto, serán remitidas pola secretaria á xunta electoral e á Secretaria Xeral para o Deporte antes das 16:00 horas do día primeiro día hábil seguinte ao da votación.

9. As actas de escrutinio serán expostas no taboleiro de anuncios da Federación Galega de Ximnasia, é na súa páxina web, desde o día seguinte das votacións e durante dous días.

Artigo 29. Documentación electoral.

1. A mesa electoral preparará a documentación electoral que distribuirá en dous sobres.
2. O primeiro sobre conterá o expediente electoral, composto polos seguintes documentos:
 - a) Orixinal da acta de constitución da mesa electoral.
 - b) Lista do censo electoral de voto por correspondencia.
 - c) Lista numerada das persoas votantes e das papeletas ás cales se lles negase validez ou fosen obxecto dalgunha reclamación.

d) Acta de escrutinio.

3. O segundo sobre conterá copia da documentación anteriormente citada.

4. Unha vez pechados os sobres, a presidencia e os vogais asinaranos por riba das lapelas que os pechan e serán remitidos, dentro das vinte e catro horas seguintes, á xunta electoral, e a Secretaria Xeral para o Deporte.

Artigo 30. Do voto por correo.

1. Poderá exercerse o voto por correo nas votacións que, cada catro anos, se convoquen para a elección de membros da asemblea xeral. O voto presencial prevalecerá sobre o emitido por correo no caso de concorrencia de ambos.

2. As persoas electoras poderán exercer o seu dereito de voto por correo, de conformidade co seguinte procedemento:

a) As solicitudes de voto por correo poderán presentarse a partir do día seguinte ao da convocatoria das eleccións e ata cinco días hábiles despois da publicación do censo definitivo. Presentarase preferiblemente por vía electrónica a través do formulario normalizado dispoñible na sede electrónica da Xunta de Galicia <https://sede.xunta.gal>, dirixida á Secretaria Xeral para o Deporte, conforme o modelo do Anexo II (Código de procedemento DE200A)

A presentación electrónica será obrigatoria para as entidades deportivas e outras persoas electoras que estean obrigadas a relacionarse electronicamente coa Administración. De conformidade co artigo 68.4 da Lei 39/2015, do 01 de outubro, do procedemento administrativo común das administracións públicas, se algunha das persoas interesadas obrigadas á presentación electrónica presenta a súa solicitude presencialmente, requirirase para que a emende a través da súa presentación electrónica. Para estes efectos considerase como data de presentación da solicitude aquela en que for realizada a emenda.

Para a presentación electrónica poderá empregarse calquera dos mecanismos de identificación e sinatura admitidos pola sede

electrónica da Xunta de Galicia, incluído o sistema de usuario e clave Chave365 (<https://sede.xunta.gal/chave365>)

No caso das persoas xurídicas, deberá solicitar o voto por correo a persoa que apareza no censo como representante.

As persoas interesadas que non estean obrigadas á presentación das solicitudes, opcionalmente poderán presentalas nos servizos provinciais da Secretaría Xeral para o Deporte ou en calquera dos lugares e rexistros previos na normativa reguladora do procedemento administrativo común, utilizando o formulario normalizado dispoñible na sede electrónica da Xunta de Galicia.

b) Unha vez recibida a solicitude, a Administración deportiva comprobará a inscrición da persoa solicitante no censo electoral e enviaralle por correo certificado os sobres electorais e as papeletas de todas as candidaturas, así como a documentación necesaria, ao domicilio indicado na súa solicitude ou, na súa falta, ao que figure no censo.

c) A persoa electora introducirá a papeleta no sobre de votación do estamento, especialidade deportiva e circunscrición a que pertenza. Posteriormente, este sobre introducirase dentro do que vai dirixido á mesa electoral do voto por correo, xunto coa fotocopia do DNI ou documento identificativo equivalente.

d) O envío deberá realizarse nalgunha das oficinas de Correos, antes do sexto día hábil previo á data de realización das eleccións, e deberá dirixirse ao enderezo da Secretaría Xeral para o Deporte, que custodiará a documentación ata o día da votación.

3. O prazo límite para recibir os votos por correo finalizará vinte e catro horas antes das votacións presenciais.

4. Unha vez rematado o período para solicitar o exercicio de voto por correo, e sendo definitivas as persoas electoras que foron autorizadas para exercer o voto por correo, o censo definitivo dividirase en dúas seccións, unha en que figuren as persoas electoras que non solicitaron o voto por correo e outra nun censo especial de voto por correo. En ningún caso poderá figurar unha persoa nas dúas seccións do censo electoral definitivo.

- *Notificacións, trámites posteriores á presentación das solicitudes e comprobación de datos (código de procedemento DE200A)*

1. As notificacións efectuaranse preferentemente por medios electrónicos e, en todo caso, cando as persoas interesadas resulten obrigadas a recibilas por esta vía. As persoas interesadas que non estean obrigadas a recibir notificacións electrónicas poderán decidir e comunicar en calquera momento que as notificacións sucesivas se efectúen ou deixen de efectuar por medios electrónicos.

A persoa interesada deberá manifestar expresamente a modalidade escollida para a notificación (electrónica ou en papel) no formulario. No caso de optar pola notificación en papel efectuarase a notificación segundo o establecido na normativa reguladora do procedemento administrativo común.

De conformidade co artigo 45.2 da Lei 4/2019, do 17 de xullo, de administracións dixital de Galicia, as notificacións electrónicas efectuaranse mediante a comparecencia na sede electrónica da Xunta de Galicia e a través do Sistema de notificación electrónica de Galicia-Notifica.gal. Este sistema remitiralles ás persoas interesadas avisos da posta á disposición das notificacións na conta de correo e/ou teléfono móbil que consten na solicitude. Estes avisos non terán, en ningún caso, efectos de notificación efectuada e a súa falta non impedirá que a notificación sexa considerada plenamente válida.

No caso de persoas interesadas obrigadas a recibir notificacións só por medios electrónicos, deberán optar, en todo caso, no formulario, pola notificación por medios electrónicos, sen que sexa válida nin produza efectos no procedemento unha opción diferente.

As notificacións por medios electrónicos entenderanse efectuadas no momento en que se produza o acceso ao seu contido. Cando a notificación por medios electrónicos sexa de carácter obrigatorio, ou for expresamente elixida pola persoa interesada, entenderase rexeitada cando transcorresen dez días naturais desde a posta á disposición da notificación sen que se acceda ao seu contido, nos termos previstos na normativa reguladora do procedemento administrativo común.

Se o envío da notificación electrónica non for posible por problemas técnicos, efectuarase a notificación polos medios previstos na normativa reguladora do procedemento administrativo común.

2. A sede electrónica da Xunta de Galicia permitiralles ás persoas interesadas realizar trámites electrónicos con posterioridade ao inicio do expediente, accedendo á carpeta cidadá da persoa interesada. Cando as persoas interesadas non resulten obrigadas á presentación electrónica, tamén poderán realizarse estes trámites presencialmente en calquera dos lugares e rexistros establecidos na normativa reguladora do procedemento administrativo común.
3. Para a tramitación deste procedemento consultarase automaticamente os datos incluídos nos seguintes documentos en poder da Administración actuante ou elaborados polas administracións públicas, agás que a persoa interesada se opoña a súa consulta:

- a. DNI ou NIE da persoa solicitante
- b. DNI ou NIE da persoa representante
- c. NIF da entidade solicitante
- d. Datos incluídos no Rexistro de Entidades Deportivas de Galicia previsto na Lei 3/2012, do 2 de abril, do deporte de Galicia, e regulado conforme o Decreto 85/2014, do 3 de xullo, polo que se aproba o Regulamento do Rexistro de Entidades Deportivas de Galicia.

No caso de que as persoas interesadas se opoñan á consulta, deberán indicalo no recadro correspondente habilitado no formulario de solicitud e achegar unha copia dos documentos. Cando así o exixa a normativa aplicable, solicitarase o consentimento expreso da persoa interesada en realizar a consulta.

Excepcionalmente, no caso de que algunha circunstancia impossibilitase a obtención dos citados datos, poderáselles solicitar á persoa interesada a presentación dunha copia dos documentos correspondentes.

- Escrutinio do voto por correo.

1. Constituída a mesa, nas condicións establecidas neste regulamento, a presidencia procederá a desprecintar as sacas e procederá á comprobación da correspondencia entre os sobres e o censo electoral. Non se admitirán os sobres e votos daquelas persoas electoras que consten no censo electoral que votaron de forma presencial.

2. Unha vez comprobado, os membros da mesa procederán a abrir o sobre principal e a clasificar os sobres por estamentos, procedendo o presidente de seguido a introducilos na urna correspondente.

3. Unha vez finaliza a introdución dos sobres nas urnas, comezará inmediatamente o escrutinio, función que corresponde exclusivamente á mesa electoral.

4. A presidencia procederá ao escrutinio das papeletas en voz alta, unha a unha, exhibindo cada papeleta ás persoas presentes e anotándose o voto correspondente a cada persoa candidata.

5. Concluído o escrutinio, que non poderá ser interrompido, estenderase a oportuna acta asinada por todos os compoñentes da mesa electoral.

6. Son nulos os votos emitidos en papeleta ou sobre de modelos distintos dos facilitados pola xunta electoral; as papeletas que teñan riscadas; os votos en que por calquera razón, non se poida determinar inequivocamente a candidatura elixida: aqueles votos en que se marquen máis nomes dos establecidos no regulamento electoral para cada estamento ou inclúan o nome de persoas non candidatas. No caso de conter máis de unha papeleta coas mesmas candidaturas marcadas, computarase como un só voto válido, para este caso se as candidaturas marcadas son diferentes deberá computarse como voto nulo. As papeletas deberán conservarse para o caso de que se faga algunha reclamación sobre elas.

7. Consideraranse votos en branco aqueles sobres que non conteñan ningunha papeleta e aqueles sobres que conteñan papeletas que non presenten ningunha marca.

8. Feito o recuento de votos segundo as operacións anteriores, que exerza a presidencia preguntará se hai algunha protesta que facer contra o escrutinio. Se non se formulan, ou despois de resoltas pola maioría da mesa, a presidencia anunciará en voz alta o resultado, especificando o número de

votantes, de votos válidos, nulos, votos en branco e de votos obtidos por cada candidatura.

9. Concluídas as operacións, os membros da mesa asinarán a acta da sesión, na cal figurarán, obrigatoriamente, os seguintes datos:

- a) Número de persoas electoras a quen se admitiu e notificou o seu dereito a exercer o voto por correo.
- b) Número de votos emitidos.
- c) Votos declarados nulos, en branco e válidos.
- d) Número de votos válidos obtidos por cada persoa candidata.
- e) Observacións presentadas ante a mesa electoral sobre a votación e o escrutinio polas persoas candidatas ou interventoras.
- f) Resolucións motivadas da mesa electoral sobre as observacións presentadas e votos particulares.



10. As actas correspondentes aos resultados das votacións e o censo electoral no que conste os electores que exerceron o seu dereito a voto por correo, serán remitidas pola secretaria á xunta electoral e á Secretaria Xeral para o Deporte antes das 16:00 horas do día primeiro día hábil seguinte ao da votación.

11. As actas de escrutinio serán expostas no taboleiro de anuncios da Federación Galega de Ximnasia e na súa páxina web, desde o día seguinte ao das votacións e durante dous días hábiles.

- Documentación electoral.

1. A mesa electoral preparará a documentación electoral que distribuirá en dous sobres.

2. O primeiro sobre conterá o expediente electoral, composto polos seguintes documentos:

- a) Orixinal da acta de constitución da mesa electoral.
- b) Lista do censo electoral de voto por correspondencia.



- c) Lista numerada das persoas votantes e das papeletas ás cales se lles negase validez ou fosen obxecto dalgunha reclamación.
- d) Acta de escrutinio.

3. O segundo sobre conterá copia da documentación anteriormente citada.

4. Unha vez pechados os sobres, a presidencia e os vogais asinaranos por riba das lapelas que os pechan e serán remitidos, dentro das vinte e catro horas seguintes, á xunta electoral, e a Secretaria Xeral para o Deporte.



Capítulo X. Da moción de censura.

Artigo 31. Moción de censura.

A presentación dunha moción de censura contra a persoa presidenta da Federación Galega de Ximnasia axustarase ós seguintes criterios:

- a) Non poderá presentarse durante os seis primeiros meses de mandato, nin cando resten entre seis meses e un ano ata a data a partir da cal poida realizarse a convocatoria de eleccións, circunstancia a determinar polas normas da federación.
- b) A moción de censura deberá ser proposta e presentada, polo menos, pola terceira parte dos membros da asemblea xeral e incluírá necesariamente unha persoa candidata á presidencia da federación.
- c) A presentación da moción de censura dirixirase á xunta electoral da federación, que deberá resolver o que proceda no prazo de dous días hábiles.
- d) Cando se acorde a admisión a trámite da moción de censura, a presidencia da federación deberá convocar a asemblea xeral nun prazo non superior a corenta e oito horas, a contar desde que lle sexa notificada a admisión. A asemblea xeral que debata sobre a moción de censura deberá celebrarse nun prazo non inferior a quince días nin superior a trinta días, a contar desde que fora convocada.
- e) Unha vez convocada a asemblea extraordinaria para o debate e votación da moción de censura, e dentro dos dez primeiros días seguintes a esa convocatoria, poderán presentarse mocións alternativas. En ningún

caso a moción de censura alternativa poderá ser subscribida por quen promovera a inicial.

f) A votación, que deberá ser secreta, seguirá o mesmo sistema que o previsto para a elección da presidencia. Para que a moción de censura prospere e cese de forma automática a persoa que ocupa a presidencia, se requirira que, sometida a votación, sexa aprobada pola maioría absoluta dos membros da asemblea xeral.

Se a moción fora aprobada, a persoa candidata que resulte elixida permanecerá no cargo polo tempo que restase ata a finalización do período de mandato da anterior presidencia.

g) Se a moción fora rexeitada pola asemblea xeral, as persoas signatarias non poderán presentar outra ata transcorrido un ano, a contar desde o día da súa votación e rexeitamento.

h) Informarase a través da páxina web da federación da presentación da moción de censura e da data da convocatoria da asemblea xeral, así como do resultado.

i) As decisións que adopten os órganos federativos en relación coa presentación, admisión, tramitación e votación da moción de censura, ou mocións alternativas, poderán recorrerse ante o Comité Galego de Xustiza Deportiva no prazo de cinco días hábiles.

Capítulo XI. Da réxime de reclamacións e recursos.

Artigo 32. Reclamacións ante a xunta electoral.

1. O coñecemento de todas as reclamacións que se poidan formular na materia electoral corresponde á xunta electoral, e serán todas as súas resolucións impugnables ante o Comité Galego de Xustiza Deportiva.

2. Están legitimados para interpoñer estas reclamacións as persoas representantes das candidaturas ou as persoas ou entidades debidamente afectadas polos acordos da xunta electoral.

3. As reclamacións ante a xunta electoral serán presentados, persoalmente ou por calquera medio que acredite fidedignamente en dereito a presentación do escrito (buofax, correo certificado, telegrama, correo electrónico...), na sede federativa mediante escrito dirixido á presidencia da

xunta electoral, nas reclamacións á xunta electoral deberá constar o enderezo de correo electrónico a efectos das notificacións das resolucións das reclamacións

4. Os prazos para a presentación destes recursos, así como os de resolución da xunta electoral serán de dous días hábiles, e respectaranse en todo caso os establecidos no Decreto que regula este proceso electoral si se estableceran outros distintos.

Artigo 33. Recurso ante o Comité Galego de Xustiza Deportiva.

De acordo co disposto no artigo 88 da Lei 3/2012, de 2 de abril, do deporte de Galicia, correspóndelle ao Comité Galego de Xustiza Deportiva o coñecemento e a resolución dos recursos que neste proceso electoral adopte a federación, podendo adoptar, no ámbito das súas competencias, as medidas necesarias para garantir a legalidade do proceso electoral.

1. Contra os acordos e resolucións da xunta electoral procederá recurso electoral ante o Comité Galego de Xustiza Deportiva, poñendo fin, as resolucións deste, á vía administrativa.

2. Están lexitimados para interpoñer o recurso quen fose parte na impugnación ante a xunta electoral federativa ou as persoas interesadas directamente polo seu acordo ou resolución.

3. Os prazos de imposición do recurso electoral ante o Comité Galego de Xustiza Deportiva será de tres días hábiles contados dende o seguinte as da notificación da resolución ou acordo obxecto de recurso ou, se fora o caso, dende o momento en que se produza a desestimación tácita da reclamación electoral presentada.

4. O escrito de interposición do recurso deberá expresar:

a) O nome, DNI ou NIE, enderezo electrónico e domicilio da persoa física ou denominación, CIF, enderezo electrónico e enderezo social da persoa xurídica.

b) Se é o caso, o nome, DNI e enderezo do representante do interesado, podendo acreditar a súa representación, ademais de polos medios legais

precedentes, a través de comparecencia ante a Secretaría do Comité Galego de Xustiza Deportiva.

- c) A lexitimación para interpoñer o recurso.
- d) O acto contra o que se recorre e a razón da súa impugnación.
- e) As consideracións de feito e de dereito en que se baseen as súas pretensións, así como as propostas de proba que ofrezan en relación con aquelas.
- f) As pretensións que deduzan de tales consideracións.
- g) Lugar, data e sinatura.

5. O Comité Galego de Xustiza Deportiva será competente para coñecer, en última instancia administrativa, dos recursos interpostos contra:

- a) O acordo de convocatoria das eleccións, así como contra o calendario electoral e fronte a composición da Xunta electoral.
- b) As resolucións que se adopten en relación con o censo electoral provisional e definitivo.
- c) As resolucións adoptadas durante o proceso electoral pola comisión xestora e a xunta electoral da federación en relación co proceso electoral e as restantes cuestións previstas na norma que regula este proceso electoral.

Artigo 34. Interposición dos recursos.

Os recursos dirixidos ao Comité Galego de Xustiza Deportiva deberán presentarse nos órganos federativos ou xunta electoral que, se é o caso, adoptasen as actuacións, acordos ou resolucións que se pretenden impugnar. A Xunta Electoral remitirá no mesmo día o seguinte á presentación, por correo electrónico ao enderezo eleccionfederación2022@xunta.gal o recurso co expediente completo e o seu informe. Transcorrido o prazo correspondente sen que se interpoña o recurso, os acordos ou resolucións serán firmes.

Artigo 35. Tramitación dos recursos.



Á tramitación dos recursos atribuídos ao coñecemento do Comité Galego de Xustiza Deportiva aplicaráselle a lexislación sobre procedemento administrativo común e o Decreto 120/2013 do 24 de xullo polo que se aproba o Regulamento do Comité Galego de Xustiza Deportiva, agás os prazos dos distintos trámites que se axustarán ao disposto no presente decreto e aos acordos do Comité Galego de Xustiza Deportiva.



Artigo 36. Regras especiais aplicables aos procesos electorais que teñan lugar durante o ano 2022.

1. Na realización das eleccións das federacións deportivas galegas que se van desenvolver durante o ano 2022, e dadas as excepciónais circunstancias ocasionadas pola evolución da situación epidemiolóxica derivada da COVID-19 na comunidade Autónoma, a referencia ás participacións nas competicións oficiais nas dúas tempadas anteriores á da realización das eleccións do artigo 8.1. a), entenderase realizada ás tempadas 2018/2019 e/ou 2019/2020, no caso das persoas deportistas ou técnicas/adestradoras que non puidesen competir, polas circunstancias excepciónais da pandemia, nas tempadas 2019/2020 e/ou 2020/2021. Pola súa parte, e para o caso do estamento de entidades deportivas, a referencia do artigo 8.1.b) á participación desde o mes de xaneiro dos dous anos anteriores ao de realización das eleccións, entenderase realizada aos anos 2018 e/ou 2019, no lugar de aos anos 2020 e/ou 2021, nos mesmos termos ca os sinalados para o caso das persoas físicas.
2. O sistema de acceso ao censo electoral regulado no artigo 15.4 deberá garantir o seu acceso a todos os integrantes dos distintos estamentos da federación Galega de Ximnasia dos anos 2018, 2019, 2020 e 2021 e/ou tempadas que abrangan estas anualidades.



ANEXO I

Modelo de sobres de votación e papeletas



a) Sobre de votación.

Eleccións á asemblea xeral da Federación Galega de Ximnasia

Estamento de.....

Especialidade de (se é o caso).....

Circunscrición.....

Mesa electoral.....

Indíquese, cando corresponda, se a persoa electora está incluída nalgún dos seguintes supostos:

o Estamento de deportistas: deportista cualificado como deportista (galego/estatal) de alto nivel.

b) Sobre para a remisión do voto por correo.

O sobre para a remisión do voto por correo deberá conter os seguintes datos.

No ANVERSO, parte superior esquerda:

"ELECCIÓNS Á ASEMBLEA XERAL DA FEDERACIÓN GALEGA DE XIMNASIA.

SOBRE DE REMISIÓN DO VOTO POR CORREO

CERTIFICADO

Empregado/a de Correos:

Valide a identidade da persoa electora por medio de DNI, Pasaporte ou outro documento acreditativo da identidade.

Inclúase no presente sobre:

-Sobre de votación pechado

-Certificado orixinal autorizando o voto por correo, previa estampación do selo de datas.

Estampe o selo de datas no anverso deste sobre"

No ANVERSO, parte inferior dereita, deberá figurar o destinatario cos seguintes datos:

"SECRETARÍA XERAL PARA O DEPORTE

APARTADO DE CORREOS 2258

Código Postal 15.704

Santiago de Compostela, Sucursal 2"



No ANVERSO, na parte superior dereita do anverso deberá figurar unha casilla que indique "Franqueo Pagado", Número de cliente: 81024374 e número de contrato: 15000238, así como o escudo da federación galega de ximnasia.

No REVERSO deberá constar:

Nome/Nome do club (segundo proceda):.....

Apelidos/codigo de inscrición no rexistro da
SXD:.....

Estamento de

Circunscrición:.....

Especialidade de (no seu caso)

Deportista de alto nivel (no seu caso).....

c. Papeleta de votación.

Votación para a elección das persoas representantes na asemblea xeral da Federación Galega de Ximnasia
Especialidade (se é o caso):
Circunscrición:
Estamento:

Dou o meu voto ás seguintes candidaturas:

1.....	26.....
2.....	27.....
3.....	28.....
4.....	29.....
5.....	30.....
6.....	31.....
7.....	32.....
8.....	33.....
9.....	34.....
10.....	35.....
11.....	36.....
12.....	37.....
13.....	38.....

14.....	39.....
15.....	40.....
16.....	41.....
17.....	42.....
18.....	43.....
19.....	44.....
20.....	45.....
21.....	46.....
22.....	47.....
23.....	48.....
24.....	49.....
25.....	50.....



A persoa electora poderá marcar na súa papeleta ata unha persoa candidata mais das que lles corresponde elixir á especialidade, ao estamento e/ou circunscrición electoral á que pertence

ANEXO II

FORMULARIO DE SOLICITUDE DE VOTO POR CORRESPONDENCIA "DE200A".

(Este formulario atópase como Anexo II no "DECRETO 171/2021, do 23 de decembro, polo que se modifica o Decreto 16/2018, do 15 de febreiro, polo que se establecen as bases e os criterios para a elaboración dos regulamentos electorais que deben rexer a realización dos procesos electorais nas federacións deportivas galegas, incluído." publicado no DOG n.º 249 do 29 de decembro de 2021; páx. 64470-64471.)





PROCEDIMENTO	CÓDIGO DE PROCEDIMENTO	DOCUMENTO
VOTO POR CORRESPONDENCIA A MEMBRO DA ASEMBLEA XERAL. PROCESOS ELECTORAIS DAS FEDERACIÓNS DEPORTIVAS GALEGAS	DE200A	SOLICITUDE

DATOS DA PERSOA SOLICITANTE

NOME/RAZÓN SOCIAL PRIMEIRO APELIDO SEGUNDO APELIDO NIF

TIPO NOME DA VÍA NÚM. BLOQ. ANDAR PORTA

PARROQUIA LUGAR

CÓDIGO POSTAL PROVINCIA CONCELLO LOCALIDADE

TELÉFONO 1 TELÉFONO 2 CORREO ELECTRÓNICO

CÓDIGO NO REGISTRO DE ENTIDADES DEPORTIVAS DE GALICIA

E, NA SÚA REPRESENTACIÓN (deberá acreditarse a representación fidedigna por calquera medio válido en dereito)

NOME/RAZÓN SOCIAL PRIMEIRO APELIDO SEGUNDO APELIDO NIF

DATOS PARA OS EFECTOS DE NOTIFICACIÓN

Enviaranse avisos da posta á disposición da notificación no correo electrónico e/ou teléfono móbil facilitados a seguir e que poderán cambiar en calquera momento a través de Notifica.gal:

TELÉFONO MÓBIL CORREO ELECTRÓNICO

ELECCIÓN DO MEDIO DE NOTIFICACIÓN PREFERENTE

As persoas obrigadas a relacionarse a través de medios electrónicos coa Administración deberán optar, en todo caso, pola notificación por medios electrónicos, sen que sexa válida para elas nin produza efectos unha opción diferente.

Electrónica, a través do Sistema de notificación electrónica de Galicia-Notifica.gal <https://notifica.xunta.gal>
Só se poderá acceder á notificación co certificado electrónico ou Chave365.

Postal (cubrir o enderezo postal só se é distinto do indicado anteriormente).

TIPO NOME DA VÍA NÚM. BLOQ. ANDAR PORTA

PARROQUIA LUGAR

CÓDIGO POSTAL PROVINCIA CONCELLO LOCALIDADE

A PERSOA SOLICITANTE OU REPRESENTANTE DECLARA:

1. O exercicio do seu voto por correspondencia a membro da asemblea xeral polo ESTAMENTO de (marque unha opción):

Clubs
 Deportistas
 Técnicos
 Xuices ou árbitros
 Outros colectivos previstos nos estatutos federativos (especificar): _____

2. O exercicio do seu voto por correspondencia a membro da asemblea xeral na Federación Deportiva Galega pola ESPECIALIDADE DEPORTIVA de: _____

3. Que todos os datos contidos nesta solicitude e na información que se rexistrará na plataforma son certos.

COMPROBACIÓN DE DATOS	
Os documentos relacionados serán obxecto de consulta ás administracións públicas. No caso de que as persoas interesadas se opoñan a esta consulta, deberán indicalo no recadro correspondente e achegar unha copia dos documentos.	OPÓÑOME Á CONSULTA
DNI ou NIE da persoa solicitante	<input type="checkbox"/>
DNI ou NIE da persoa representante	<input type="checkbox"/>
Datos incluídos no Rexistro de Entidades Deportivas de Galicia previsto na Lei 3/2012, do 2 de abril, do deporte de Galicia, e regulado conforme o Decreto 85/2014, de 3 de xullo, polo que se aproba o Regulamento do Rexistro de Entidades Deportivas de Galicia	<input type="checkbox"/>
CONSENTIMENTO PARA A COMPROBACIÓN DE DATOS A persoa interesada autoriza a consulta a outras administracións públ cas dos seguintes datos. De non autorizar a consulta deberá achegar o documento correspondente	AUTORIZO A CONSULTA
NIF da entidade solicitante	<input type="radio"/> SI <input type="radio"/> NON
NIF da entidade representante	<input type="radio"/> SI <input type="radio"/> NON

INFORMACIÓN BÁSICA SOBRE A PROTECCIÓN DE DATOS PERSOAIS	
Responsable do tratamento	Xunta de Galicia. Presidencia da Xunta de Galicia-Secretaría Xeral para o Deporte
Finalidades do tratamento	Tramitar este procedemento, verificar os datos e documentos que a persoa interesada achegue na súa solicitude para comprobar a exactitude destes, levar a cabo as actuacións administrativas que deriven e informar sobre o estado de tramitación. Así mesmo, os datos persoais incluíranse na Carpeta cidadá de cada persoa interesada para facilitar o acceso á información, tanto persoal como de carácter administrativo.
Lexitimación para o tratamento	O cumprimento dunha tarefa en interese público ou o exercicio de poderes públicos segundo a normativa recollida no formulario, na páxina https://www.xunta.gal/informacion-xeral-proteccion-datos e na ficha do procedemento na Guía de procedementos e servizos. Consentimento das persoas interesadas, cando corresponda.
Destinatarios dos datos	As administracións públicas, no exercicio das súas competencias, cando sexa necesario para a tramitación e resolución dos seus procedementos ou para que os cidadáns poidan acceder de forma integral á información relativa a unha materia.
Exercicio de dereitos	As persoas interesadas poderán solicitar o acceso, rectificación, oposición, limitación, portabilidade e supresión dos seus datos ou retirar, de ser o caso, o consentimento outorgado a través da sede electrónica da Xunta de Galicia ou nos lugares e rexistros establecidos na normativa reguladora do procedemento administrativo común, segundo se recolle en https://www.xunta.gal/exercicio-de-dereitos
Contacto coa persoa delegada de protección de datos e máis información	https://www.xunta.gal/informacion-xeral-proteccion-datos

LEXISLACIÓN APLICABLE

Decreto 16/2018, do 15 de febreiro, polo que se establecen as bases e os criterios para a elaboración dos regulamentos electorais que deben rexer a realización dos procesos electorais nas federacións deportivas galegas.

Decreto 171/2021, do 23 de decembro, polo que se modifica o Decreto 16/2018, do 15 de febreiro, polo que se establecen as bases e os criterios para a elaboración dos regulamentos electorais que deben rexer a realización dos procesos electorais nas federacións deportivas galegas.

SINATURA DA PERSOA SOLICITANTE OU REPRESENTANTE



Lugar e data

_____ de _____ de _____